



27. april 2022

UPA 2022/119

Inatsisartut aalajangiiffigisassaattut siunnersuut, Naalakkersuisut peqquneqassasut misissuissasut Royal Arctic Line Kalaallit Nunaata iluani avammullu assartuinissamut sullissinissamik akuersissutaata atuukkunnaarsinneqassappat pitsaaqutissai ajoqutissaalu, taamatuttaarlu assartuinnermut unammilleqatigiinneq eqqullugu. Misissuineq takussutississavaa sullissinissamik akuersissut peerlugu unammilleqatigiinnermillu eqqussineq aningaasatigut kingunissai qanoq isikkoqarnersut. Misissuineq Inatsisartunut UPA 2023 nallertinnagu tunniunneqassaaq.

(Inatsisartunut ilaasortaq Jens-Frederik Nielsen, Demokraatit)

Jens-Frederik Nielsen demokraatineersooq siunnersuuteqarpoq Naalakkersuisut peqquneqassasut umiarsuaatileqatigiiffiup Royal Arctic Linep Kalaallit Nunaata iluani avammullu assartuinissamut sullissinissamik akuersissutaa atuukkunnaarsinneqassappat pitsaaqutissai ajoqutissaalu misissoqullugit, tamannalu Siumumiit soqutigalugu oqaloqataaffigerusupparput, nalornissuteqarpugulli oqallinnissap sumut sammiveqarluni pinissaa eqqarsaatigalugu.

Siumumiit nalornivugut siunnersuuteqartup qulequtsiussimasaa ilaannakortumik kukkuneqartumilluunniit tunngaveqartumik oqaasertalerneqarsimasutut isikkoqarmat, taama isumaqalernitsinnut patsisaatipparput Royal Arctic Linep Kalaallit Nunaata iluani avammullu assartuinissamut sullissinissamik akuersissutaa pillugu oqaasertaliisimanermi. Danskisuuvalu qissimigaaraanni nutseraannilu imatut paasineqarsinnaasumik allassimalluni Royal Arctic Linep Kalaallit Nunaannut Kalaallit Nunaanniillu assartuinissamut sullissinissamik akuersissutaa.

Qulequtsiisimanerit taakkua oqaatsit marluk atorlugit Siumup isumaa naapertorlugu assigiinngitsorujussuupput, kalaallisuanimi nunatta iluani assartuussineq aammalu nunatsinniit avammut assartuussineq pineqarput, danskisuuvalu assartuussineq nunatsinnut nunatsinniillu pineqarlutik. Taamaammat isummernissaq sumut qanorlu sammiveqassanersoq Siumumiit assut nalornissutigaarput, naak ilimagisinnaagaluarlutigu danskisuuani oqaatsit atorneqartut, tassalu Kalaallit Nunaannut Kalaallillu Nunaanniit sullissinissamik akuersissut pineqarsimassangatipparput, avataanniimmi nunatsinnut assartuussineq allanit annertunerungarluni inissisimasuummat.

Qulequttami, taamaalillunilu taasissutigineqartussami nunatta tungaanut assartuussineq misissuititsiniarnermi ilaatinngagu Royal Arctic Linep sullissinissamik akuersissutaata atuukkunnaarsinneqassappat pitsaaqutissai ajoqutissaalu soqutiginaataa Siumup isumaa malillugu soorunami annikinnerarsuussaaq, assartuussinermi taannarpiaq qularnanngitsumik aningaasarsiorntsinnut sunniuteqarneraasimassammat.

Soorunami kalaallisut oqaatsigut aallaavigisussaagatsigit siunnersuutip massumap taama isikkoqartillugu Siumumiit taparserneqarsinnaanngitsutut nalilerparput. Oqaatsigissavarpulli siunissami kalaallisut oqaatsivut tunngavigalugit sulinerput aallaavigissagatsigu, taamatullu nalaataqaqqissagutta, kalaallisua tunngavigalugu sulinerput ingerlatissagatsigu.



Siumumiit taamatut oqaaseqarluta siunnersuut ataatsimiititaliamut susasaqartumut ingerlateqqinneqarnissaa innersuussutigaarput.

Anders Olsen, Siumut.